

**MANBASA KITA**  
**INIBALOI OF MOUNTAIN**  
**PROVINCE**

**Produced by the National Media Production Center  
Department of General Services  
Manila, Philippines**

## P R E F A C E


*This reader was compiled by members of the Summer Institute of Linguistics from short stories contributed by teachers of the Kabayan municipality, from a previous publication of the Institute, DIBSHU III, and common Inibaloi folk stories. The book is to provide additional reading material for the second grade to stimulate interest and facility in reading.*

*Orthography used in this book is the same as the National Language except for the following symbols: ʃ as pronounced in English judge; sb as pronounced in English shoe or choose; e pronounced similarly as the petpet vowel in Pangasinan; w as pronounced variously throughout Benguet gw, bw, or v; ɬ which represents both front and back k; - which represents the glottal stop.*

*Special acknowledgment is due to Messrs. Biano Baucas, Marven Atos, and Moreno Molintas, and Mrs. Emilia Pucay for their assistance in the preparation of this reader.*

- SUMMER INSTITUTE OF LINGUISTICS

# MANBASA KITA



# INIBALOI

# MANBASA KITA

## INIBALOI

### PART I

Iraka mandokto .....	1
Sota Aso nen Gido .....	16
Penodong shi baley .....	17
Apil .....	20
An angiyew i san ama .....	21
Showen anak .....	24
Si Binay-an nen Coling .....	25

### PART II

Sota bakes tan sota otot .....	30
Sota bokaw tan sota tabaw .....	31
Tinodongan ni timel i olsa .....	34
Sota ambalengen aso tan sota ampotin aso .....	35
Nanposta i shanom tan shagem .....	37
Sota manemnem ja otot .....	39
Dingka ni aki i baley ni palashongay .....	41
Sota otot tan sota kiling .....	43
Sota tingey tan sota tilay .....	45
Kapoaan ni beshing .....	47
Sota matangsit ja kawitan .....	49
Sota aki tan sota potjokan .....	51
Nanbaljan ni tingey shi shanom .....	52
Showen bangol .....	53
Ag naogipan ni bakes .....	55
Kapoaan ni bokaw .....	58
Adagitan ja adakay .....	59
"Bangew! Bangew!" .....	61



### IRAKA MANDOKTO

Maowang i bii.

Iman i kayabang to.

Ondaw shi doktoan.

Ondaw shi doktoan ja mandokto.



lyay i aba-kol.  
Ondaw i aba-kol shi doktoan.  
Maowang i aba-kol.  
Nankayabang i aba-kol.  
Ondaw ja mandoktod doktoan.

Nan-apsol i bii tan aba-kol.  
Nan-apsol ired shalan.  
“Towey daŵan mo,” kowan ni aba-kol.  
“Ondawak shiman.  
Nak mandokto.

Nak mandoktod doktoan,” kowan ni bii.  
“Nak mandokto ngo,” kowan ni aba-kol.  
“Etiga, maowang kita.  
Eti, ondaw kited doktoan,” kowan ni aba-kol pay.  
“Owen,” kowan nima bii.  
“Ayshiy kadŵak.  
Ayshiy kadŵak shi shalan.  
Ayshiy kadŵak ja maowang.  
Antakotak.”

Shakel ja salodsod.  
Sipa irey maowang?  
Towey daŵan sha?  
Ngantoy daŵan shed man?  
Amtam ja mandokto?  
Moka atngis inam ja mandokto?

Kowan ni bii, “Todaley sangkap mo ina?”  
“Taŵey,” insongbat ni aba-kol.  
“Ayshila.  
Na-kas emola.  
Ayshiled kayabang ko.  
Na-kas emoled shalan.”  
Kowan ni bii shi nemnem to,  
“Na-kas da i sangkap nen ina.  
Na-kas emoled shalan.”

Kowan ni aba-kol, "Moga anap shiman.  
Moga anap shi shalan.  
Balang nem sepolen mo."

Kowan ni bii, "Shiyay ka ina.  
Ondawak shiman.  
Atngan taka ni anap, nem towey kad-an to.  
Balang nem sepolen ko."

"Owen, moga anap shiman,"  
Kowan ni aba-kol mowan.  
"Balang nem w̄aren on-an mo."

Ma aliy bii.  
In-an ni aba-kol.  
W̄arey sangkap shi takday to.  
In-an ni aba-kol i sangkap.  
Simpol ni biy sangkap.  
Aman-imdeng i aba-kol.  
Abadeg i imdeng to.



Todala sota sangkap ni aba-kol?  
Ngantoy inkowan ni aba-kol so nonta bii?  
Sipa i simapol ni sangkap?  
Sipa i aman-imdeng?  
W̄arey inatngan mon aba-kol?

Kowan ni aba-kol.  
"Mapteng ken anak.  
Mapteng i nemnem mo."

Mimotok ired doktoan sha.  
Nan-obda iren showa.  
Nan-obda i biid doktoan to.  
Nan-obda i aba-kol ngod doktoan to.  
Abayag iren nan-obda.  
Abayag ired doktoan.  
Nabdey ira ni obda.  
Nabdey iren shili.

Kowan ni aba-kol,  
"Naksheng i obdam anak?"

"Owen ina.  
Eti, on-akad kita."

Shakel i dinokto ni bii.  
Shakel i dinokto ni aba-kol.  
Napno i kayabang ni aba-kol.  
Napno i kayabang ni bii.  
Napno i kayabang shen showa.

Kowan ni bii.  
"Shakel i doktod kayabang mo ina.

Ambel-at ja shiliy kayabang mo.”

“Owen, ambel-at ja shili,”

insongbat ni aba-kol.

Mapteng i nemnem nima bii?

Ngantoy abayagkan shed doktoan?

Pigan i in-akad sha?

Ngantoy nay-iyang-shi kayabang sha?

Kowan ni bii, “Ag ka onposin man-ekad.

Ambel-at i dinoktom.

Shakel i dinoktom.

Napno i kayabang mo ni dokto.

Kanin, egshian koga i eshom.

Atngan taka ni egshi.”



“Owen, tep makedsang ka,”

kowan ni aba-kol.

Inda ni biiy eshom ja dokto ni aba-kol.

Aman-imdeng mowan sota aba-kol.

Inojon ni biiy kayabang to.

Inojon ni aba-kol i kayabang to ngo.

Abadeg i kayabang ni aba-kol.

Ootik i kayabang ni bii.

Sota kayabang ni aba-kol, napno ni dokto.

Sota ootik ja kayabang ni bii, napno ngo ni dokto.

Ambel-at i inojon ni aba-kol.

Ambel-at i inojon ni bii.

Ag onposi sota aba-kol.

Makedsang sota bii.

Makedsang ja man-ekad shi shalan.

Sipa i makedsang?

Sipa i ag onposi?

Mapteng ja anak sota bii?

Ngantoy?

Nabdey i aba-kol.

Piyan ton man-ajas.

“Man-ajas kita,” kowan to so nonta bii.

“Owen, man-ajas kita.

Nabdeyjak ngo.

Piyan kon man-ajas ngo,”

insongbat ni bii.

Inon-an ni biiy kiyew.

Inon-an tod kilig ni shalan.  
Shakel i bolong nonta kiyew.

“Iman i kiyew shi kilig ni shalan.

Iman i sirom to.

Man-ajas kited sirom to.

Iman i koston tongawan ta.

Man-ajas kited man,” kowan ni bii.

Simbi ni biiy sirom.

Simbi ni aba-kol i sirom.

Insaad ni biiy kayabang to.

Insaad ni aba-kol i kayabang to ngo.

Timongaw i aba-kol shi bato.

Timongaw i biid bato ngo.

Timongaw iren showed bato.

Nan-ajas ired sirom.

Shakel i inon-an sha.

Warey shakel ja titit.

Warey titit ja nanpatok shi kiyew.

“Ara, shakel i titit,” kowan ni bii.

Kowan ni aba-kol,

“Nan-ajas kiten abayag.

Eti, ondaw kita mowan.

Ambel-at i kayabang ko.

Itodod moga.

Itodod mo i kayabang ko.”

“Itodod moga i kayabang ko ngo,”

kowan ngo ni bii.

“Owen, itolod ko,” insongbat ni aba-kol.

Ngaran i piyan ni aba-kol?

Towey kad-an ni kiyew?

Towey nan-ajasan sha?

Ngaran i inon-an sha?

Warey tebteb shi kilig ni shalan.

Shakel i shanom shi tebteb.

Malinis i shanom shi tebteb.

Sota bii, piyan ton man-inom.

“Mapteng ja mainom i shanom shi tebteb,”

kowan ni aba-kol.

Sota bii, insaad to i kayabang to mowan.

Sota aba-kol, insaad to i kayabang to ngo.

Piyan shen man-inom shi tebteb

Warey taroy shi tebteb.

Warey pan-inoman ja tobong.

Insayang ni biiy tobong.

Nan-inom ni shanom.

Insayang to i tobong mowan.

In-akan to ni aba-kol.

Nan-inom i aba-kol.

Sipa i angitodod ni kayabang ni aba-kol?

Ambel-at i kayabang sha?

Towey nan-inoman sha?



Nan-akad ira mowan.

Simbira i abadeg ja pa-dok.

Shakei i shanom shi pa-dok.

Mapkes i shanom shi pa-dok.

"Maodsan nin i dokto." kowan ni aba-kol.



“Owen,” insongbat ni bii.

“Shakel i shanom shiyay.

Sirom pay shiyay.”

Inodsan sha i dokto shi kilig ni pa-dok.

Inodsan sha i sangkap sha.

Kowan ni aba-kol, “Ayshi ma i maodsan.

Naksheng i oras ni dokto.

Eti, ondaw kita mowan.

Kanoim, kanoim. Medebi nem ekay.”

“Owen, medebi nem ekay,” kowan ni bii.

“On-im, amandeltep i akew.”

Inda ni biiy kayabang to.

Inojon to i kayabang to.

Inda ni aba-kol i kayabang to.

Inojon to i kayabang to.

Idi aman-ekad i bii tan aba-kol, shakel i inon-an shed shalan.

Na-na-jew i inon-an sha.

Inon-an sha i na-na-jew ja titit.

Warey titit ja amantejab.

Warey irey pimatok shi kiyew.

Warey inon-an shen mamapteng ja titit.

Iraka mantejab.

Ondaw ired obong sha.

Warey obong shed na-detan.

Kosto ni titit ja man-obong shi na-detan.

Na-na-jew i shotshot ni titit.

Warey atoling tan ampoti.

Warey ootik tan abadeg.

Piyan ni aba-kol ja onmotok shagos?

Ngantoy?

Ngaranni inon-an shed na-detan?

Ngaranni na-na-jew ja inon-an shed shalan?

Towey kad-an ni obong ni titit?



Nan-akad i bii tan aba-kol.  
Shakel i dinabsan shed shalan.  
Dinabsan sha i tebtob tan pa-dok.  
Dinabsan sha i kiyew tan kadasan.  
Abadeg i eshom.  
Kokonting i eshom.  
Akayang i eshom.  
  
Inon-an ni biy bayabas.  
Inon-an tod kilig ni shalan.  
Kowan to, "Imey bayabas ina.  
On-im kari. Shakel i bayabas.  
Piyen ko i adowem ja bayabas."  
Nandekas i bii ni adowem ja bayabas.  
Nandekas i aba-kol ni adowem ngo.  
In-iyen sha i eshom shi kayabang sha.

Mimotok i biid baley to.  
Mimotok i aba-kol ngod baley to.  
Nay-apsol i aso ni bii.  
Nay-apsol i aso ni aba-kol.  
Amanw̃ikiwik i aso.  
Pinikpik ni biy aso to.  
Nanw̃ikiwik mowan.  
Insaad ni biy kayabang to.  
Insaad ni aba-kol i kayabang to  
Napno i doktod kayabang sha.  
Warey bayabas shi kayabang sha.  
In-akan sha i bayabas so ni aanak.

Aman-imdeng i aanak.  
Iraka man-umdeng ja shili.

Ngaranni indared shalan?  
Ngaranni nay-apsol shi baley?  
Aman-umdeng irey aanak shi baley?  
Ngantoy?



## SOTA ASO NEN GIDO

Warey aso nen Gido ja ngapol.

Say ngaran to, si Spat.

Mateba tan sisiked i bowek to ja nan-isag ni atoling tan ampoti.

Akolikol i ikol to.

Ansemek nen Gido ja pasia i aso to.



Inakew ja toka akni ni kenen to tan toka a-mesa ni olay, jet enshiy timel to.

Indag-an to ni mapteng ja okipan to shi kosina.

Mageno ja bimadeg i aso nen Gido.

Idi bimadeg ma si Spat, ansemek to ngo si Gido.

Kaontakin ni olay shi emin ja dawān nen Gido.

Toka wādware si Gido shima toka pengiyewi ono shi gardin nem an menibog ni mola.

Aman-bantay ni baley ni kalebian.

Mapteng ja kadwā tan kajem i aso ja masmek tan maronong.

1. Sipa i ngaran ni aso nen Gido?
2. Ngaranto i itsora ni bowek to?
3. Masmek i aso nen Gido?
4. Kaontakin son Gido ni olay?
5. Warey asom ja ansemek mo?

## PENODONG SHI BALEY

Sakey ja Sabaron agsapa, maowang si Marita.

Tinewal to i tedon anak to, jet binidin to ira ni deg-en sha shi baley.

Kowan nen Marita so ni anak to, "Si-kam Kating i mandoto ni timol.

Kinsoy, ka pangiyew ali say warey may-epoy.

Si-kam ngo Maling, saganam i bayo.

Ka pan-asol ni shanom tan kasang mo ira



iya pingkan.”

Idi naksheng ja inkowan Marita i obdaen sha, dimaw ma shi payew.

Tinongpal shi Kating. Kinsoy nen Maling i obdara shi baley.

Nandoto si Kating ni timol.

Dimaw ja angiyew si Kinsoy.

Nanbayo, nan-asol tan angiwān si Maling ni pingkan.

Idi naksheng i obdara, nandinis pay ira shi baley.

Shakel i inmotok nen Kinsoy ja kiyew.


Mama-shem ma mimotok si Marita ja adapo alid payew Aman-iimdeng ja pasia tep naksheng ja emin i obda shi baley.

Kowan to so ni anak to. “Mapteng kayo ja anak ko.

Tinongpal jo i inkowan ko son si-kayo.

No satan ni olay i pesing jo, masi-metak ja mengeda ni mesepol jo shi iskoidaan ja dapis, papil, tan baro jo.

1. Towey dinaḡan nen Marita?
2. Piga irey anak to?
3. Tinongpal sha i inbilin nen nanang sha?
4. Ngaranni inkowan nen Marita so ni anak to?



#### APIL

Sakey ja akew, tinewal nen ama si Kimboy jet inkowan to. "Kala anak ko, w̄arey deg-en ta."  
 "Ngantoy deg-en ta, Tatang?" inbaga nen Kimboy.  
 "Mandeka kita ni baley ni manok," insongbat nen Tatang.  
 "Owen, Tatang," simongbat mowan si Kimboy.  
 "Ka pamodod ni matiljo shi baley nen apom,"

inkowan nen tatang to.

"Owen, ondawak," insongbat nen anak to.

Idi w̄ared shalan, nan-aamayo ni bāwet.

Idi onmotok shi baley apo to, dagashi i binedod to.

Idi on-oli shi baley sha, in-an to si tatang ton amandekari.

"Ay! Apil gayam i binedod ko," inkowan to ni bakdang to.

Inon-an nen tatang to jey apil i binedod to.

"Apil i binedod mo, Kimboy," inkowan nen tatang to.

"Pan-oli ka mowan jet mo ala i matiljo.

Aliw̄en dagashi i kowan kon bodoren mo."

Imoli mowan si Kimboy ja to inda i matiljo, jet si-kato i inosal sha.

1. Ngantoy kowan nen tatang to ja deg-en sha?
2. Ngantoy kowan nen tatang to ja bodoren Kimboy?
3. Ngantoy inamayo tod shalan?
4. Ngantoy binedod to?
5. Inbonget nen tatang to?
6. Imoli si Kimboy ja memodod ni matiljo?

#### AN ANGIYEW I SAN AMA

Si Tesi, anak nen Magsiano.

Ama nen Tesi, si Magsiano.

Sakey ja Sabaro, dimaw ired shontog ja angiyew.

Injo-tog sha i tengshal ni panga ni belbel.  
Shakel i tinengshal shen panga ni kiyew.  
Kinel-asan shen emin i tinengshal sha.  
Dimibag ira jey adabi.  
"Amankedabi; on-akad kita, Tatang." inkowan



nen Tesi.  
"Owen, on-akad kita; adabi gayam da," insongbat nen Magsiano.  
Amasan ira ni kiniyew shen pating.  
Si Tesi tep nga-nga pay, sakey bengat i pinsan ton pating.  
Idi iraka man-ekad shi shalan, in-an nen Tesi i shakel ja talaw shi taben.  
In-an to pay i bolan ja masdag.  
"Ara! Ashakel i talaw niman.  
Iraka onkanimkim," inkowan nen Tesi son ama to.  
"Maniyal pay i ambanaw ja bolan," intoloy nen Tesi.  
"Onteg-in niman ja dabi," kowan nen Magsiano.  
"No angiskis tan shakel i talaw shi taben, amta ni totoo ma jey teg-in," inkowan nen Magsiano.

Sajay i tabtabal nen Tesi tan si tatang to shi shalan sha.  
Adaraw ja pasia jey onmotok ired baley sha.  
In-aral sha i kiyew sha shi bo-day ni baley sha.  
Inabdey si Tesi ja pasia tep pinsak ton pengiyew to shi ara<sup>w</sup>in shontog.

1. Sipa i tatang nen Tesi?
2. Towey dina<sup>w</sup>an sha ni sakey ja Sabaro?
3. Ngaranni inon-an nen Tesi shi taben?

## SHOWEN ANAK

Si Kadjas nen Bitdag, iraka man-iskoida.

Showa i dibshora.

Iraka man-odoodop ni inaakew shi iskoidaan.

"Ngantoy nandanganan mo nonta Donis shi iskoidaan, Kadjas?" sinedodsod nen Bitdag.

"Simakitak nonta Donis: isonga akak ali nan-iskoida," insongbat nen Kadjas.

"Ansakit ja pasia i toktok ko tan bakdang kon



emin," itoloy Kadjas.

"Kowan nen maistoro tayo jey ngaaw i mandengalengan kita shi iskoidaan.

Ootik i maashal kono." kowan nen Bitdag.

"Owen a, nem nansakitak met.

Ag toak aya kaasian nen maistoro tayo?"

sinedodsod mowan nen Kadjas.

"Owen, kaasian toka tep nansakit ka," insongbat nen Bitdag.

"Niman ma tep matekal kita, man-iskoida kita ni olay," intoloy Bitdag.

"Owen, man-iskoidaak ni olay nem akak onsakit say Warey ashale kon ashakel," inpodno nen Kadjas.

Simekep si Kadjas nen Bitdag shi iskoidaan.

Inkari sha jey man-ashal iren pasia.

Inkowan sha jey ag ira mandengalengan shi iskoidaan sha.

1. Towcy kapan-iskoidai niya anak?
2. Ngantoy nandanganan nen Kadjas?
3. Mandengalengan ired iskoidaan sha?

## SI BINAY-AN NEN COLING

Si Binay-an nen Coling, nan-askang i baley sha.

San kasingsing ira tan kaodop ira.

Mapteng i shaka pesing ja showa.

"Binay-an kala: ondaw shi shanom," kowan nen Coling.

"Ngantoy?" simongbat si Binay-an.

"Kita mannikay shi shanom," kowan nen Coling.

"Owen gayam, tep sekit niman.



Ampetang pay i shanom," kowan nen Binay-an.

Dimaw ired shanom nontan ja sakey ja akew.

Ira nannigay ni paydeng tan bayek.

"On-akad ma?" sinedodsod nen Binay-an si kadwā to.

"Kanin, ootik pay i indak ja paydeng tan bayek.

Kolang ja sira mi nem ma-shem," insongbat nen Coling.

"On-akad kita et.

Amankedabi met," songbat mowan nen Binay-an.

"Ashakel i indak ja nigay.

Iaknan taka ni ootik," intoloy nen Binay-an.

"Salamat ngarod.

Angken on-akad kita, say ag kita medebian,"  
insongbat nen Coling.

Mimotok ired baley sha.

In-an nen ama sha tan si ina sha i nigay shen



showa.

Iraka mansi-si-met ja emin.

1. Sipa i kaodop nen Coling?
2. Ngaranni sha inda shi shanom?
3. Sipa i shakel i inda to ja paydeng?
4. Inaknan nen Binay-an si Coling?



**PART TWO**



### SOTA BAKES TAN SOTA OTOT

Sota bakes, amanpasia; inaspol to i otot.

"Towey daŵan mo?" kowan ni otot.

Kowan nonta bakes, "Ngantoy moka ikowan si-kak? Manemnemak jet akak piyan ja mekitabtabal ni enshiy nemnem to."

Sota otot, kowan to, "Bakes, amtak ja manemnem ka jey enshiy nemnem ko; nem osok ked kolon, jet poolan ko; jet on-an ta nem manemnem ka jey say apoy."

Nem kowan nonta bakes, "Enshi. Maledamsis ka. No piyan mo i eshom ja ikedot, ikdot mo i bakdang mo."

Kowan nonta otot, "Mapteng. Mepengdoak; nem ondaw ka nem on-oliak."

Sota bakes, timolok ta ninemnem to jey metey sota otot. Sota otot, imosok shi kolon jet sota aki, pino-olan to sota kolon. Jet sota otot, inanbeked bo-day, jet ag asakitan. Idi na-shep sota apoy, sota aki, dimibag ja pasia ni in-oney to so ni otot ta imoli.

Inbag-an to i otot, "Ngantoy ag ka apoodan?"

Jet sota otot, inkowan to, "Tina-bokan ko i angel kod kolon asanak nanpolipolig."

Jet sota bakes, inaysa-nad, jet imosok shi kolon; jet sota otot, inparadang to i apoy.

Sota bakes, inandibot shi kolon, jet nanpolipolig.

Ag simalsheng ni polig ingkatod etey.

1. Sipa i inaspol ni bakes?
2. Sipa i kowan to jey manemnem?
3. Ngaranni nantolagkan sha ja deg-en sha?
4. Timolok i bakes?
5. Sipa i nan-onod ja nanpool?
6. Manemnem sota bakes jey say sota otot? Ngantoy?

### SOTA BOKAW TAN SOTA TABAW

Nonta sakey ja akew, ŵarey kinibot ni bokaw ja kinoday ni apag ja naysa-pey. Intayab tod panga ni kiyew jet toka toltolti.

Warcy tabaw ja nanbaley shi sengeg nonta kiyew.  
In-an to sota bokaw. Tinangkak to jet kowan to.  
“Ara! Mamapteng i shotshot mo. Amandingsi.”  
Inteneng ni bokaw jet binidag to i payad to.



Inkowan to, “Owen, on-im kari jey mamapteng.”  
“Mapteng pay nem manjabjabtok ka,” kowan ni  
tabaw. “Pan-akad kaga. On-an koga nem sisiked.”  
Ag amta ni bokaw jey kapansaola ni tabaw.  
Amanjabjabtok shi panga ni kiyew. Kowan to jey  
matekal.

Kowan mowan ni tabaw, “Shinemag ko jey mapteng  
i kansion mo. Etiga, pankansion ka, jet iteneng ko  
nem mapteng.”

Idi onnga-ta sota bokaw, na-kas da sota kinoday.  
Sinenok ni tabaw jet inbetik to.

In-an ni pa-dong sota bokaw jet kowan to.  
“Ayshi gayam i nemnem mon bokaw. Ag mo amta  
jey sota kinoday i piningitan ni tabaw? Kowan to  
jey mankansion ka say ma-kas i kinoday

ja moka toltoltola. Aram shagos patia i ikowan sha.  
Osal mo i toktok mo nin.”

1. Ngaranni kinibot ni bokaw?
2. Sipa i timangkak nonta bokaw?
3. Ngaranni inkowan ni tabaw nonta inon-an to i  
kinoday?
4. Nankansion i bokaw?
5. Ngaranni maashal shiyay ja istoria?





#### TINODONGAN NI TIMEL I OLSA

Warey shakel ja timel jet shaka pankedata sota olsa; jet sota olsa, toka panisadsad ira sota timel.

Inkowan nonta olsa, "Ag mesepol ja manbekal kito. Mebedin ja bonoen ko i eshom son si-kayo, nem say eshom, shaka pankedata i bakdang ko. Mankajem kito jet man-aatang kito."

Timolok irey timel jet idi ondabas sota olsa, ni olay toka digdiga sota kad-an ni timel, say ag to ira ikatin.

Idi sakey ja akew, pan-osila ni aso sota olsa, jet shindan nonta olsa i askang ni timel jet inkowan to, "Si-kak si Olsa. Inosil toak ni aso. Nemnem jo i tolag tayo jet atngiyoak."

Idi nay-askang sota aso, pimeket irey timel jet inkapo sha i kalat. Idi dimi-neng ja pokpoken to ira, sota olsa, simabid shanom, jet nimangoy.

1. Ngaranto i tolag ni olsa tan timel?
2. Idi inosil ni aso, towey shindan ni olsa?
3. Ngaranni inpasing ni timel?
4. Towey namtikan ni olsa?

#### SOTA AMBALENGEN ASO TAN SOTA AMPOTIN ASO

Sakey ja maenop, warey aso ton showa. Say sakey, ambalenga, tan sota sakey, ampoti. Sakey ja akew, sota asewa ni maenop, inkowan to, "Alam i aso jet ka panganop ni olsa, tep enshiy mesid-an ja apag."

Sota maenop, tinewal to i aso to, jet dimaw ja anganop.

Sota ampotin aso, simpol to i olsa, jet inonod to ni san akew. Sota ambalenga, dimaw bengat shi akayang ja shontog jet no ampetang i sekit, ondikot shi sirom. Angken an inaskang ni olsa, ag to inosil.



Anongosto jcy inamtik i olsa. jet sota ampoti, insegang to sota ambalenga; toka pan-ikowan, "Ngantoy ag moakso inatnganan ni eshel ni olsa? Niman, say apo ta, enshiy apag to."

Sota ambalenga, insongbat to, "Aliwēn bagaan toak ni too. Ag mesepol angken enshiy apag to. Nabdeyjak ni betik nem tewālen toak."

Idi simbi nonta maenop i baley to. inkowan ni asewā to, "Ngantoy enshiy inshel mon olsa? Kabasan wāra aliy man-adibay ja too, jet enshiy apag ja mesid-an."

Insongbat nonta maenop, "Sota ambalengen aso, ag mengosil ni olsa. Mepadtin mansilbi ni man-adibay."

Jet binora tep asarot.

1. Piga i aso nonta maenop?
2. Ngaranni kolor ira nonta showen áso?
3. Sipa i dikot i dingka to shi sirom?
4. Wārey inshel shen olsa? Ngantoy?
5. Sipa i sinid-an sha tep ayshiy olsa?

#### NAMPOSTA I SHANOM TAN SHAGEM

Wārey powek. Say shagem tan shanom, iraka man-obden showa. jet kiyew, baley, tan payew, asharal.

Say shagem, simalsheng jet inkowan to. "Sa-noy kedsang ko! Shineshal ko i baley, kiyew, tan payew."

Insongbat ni shanom, "Dinibkan mo jey moakka pan-atngi, maney si-kak i w̄a-w̄a-shen nan-obda."



Nanposta ira nem sipa i makedkedsang. Say shagem, tino-kan to i kiyew, nem ag to binegnad. Say shanom, inenod tola. Kowan ni shanom, "Makedkedsangak tep mebedin ja enoren ko i kiyew." Nem kowan ni shagem, "Ag mo inenod nem akak tino-kan."

Jet dimaw ired ili. Say shagem, tino-kan to i baley, nem dingka mowan ni too. Jet sota shanom, inenod to i baley shi araŵi jet say too, ag sha inda i kiyew ja deg-en sha mowan i baley.

Jet sota shanom, angabak jet inankajem mowan ira.


1. Ngaranni dingka ira ni shanom tan shagem?
2. Sipa i kowan to ja angabak? Ngantoy?

#### SOTA MANEMNEM JA OTOT

W̄arey ashakel ja otot ja nanbaley shi baley ni baknang, jet iraka mengeda ni shakel ja bekas. Sota baknang, angala ni posa say ontakot irey otot.

Jet sota nankedakay ja otot, inkowan to, "Onbetik kito jet ondaw kitod baley ni abalon bii ja nay-askang. Manbiyag kito emo ni dokton w̄a-w̄a-sha, jet sigosho mepikot kito. Nem siged i apigot ja otot ja anshokey i biyag to jey say mateben otot ja antikey i biyag to. Say katebaan pay ni otot, kaal-a ni posa."





Jet dimaw ired baley ni abiteg ja abalon bii. Jet inamta ni abalon bii jey pankena ni otot i bekas tan dokto to. Isonga inkowan to. "Say otot, shaka pankena i pagey tan dokto, jet nem ekay enshiy mebay-an ja kenen ko. Mengedaak ni posa."

Intenengan ni otot jet sota nankedakay ja otot, inkowan sha, "Bayshan tayo i bekas tan dokto ja tayoka pankena say ag mengeda i abalon bii ni posa. In-an tayo i baknang ja amengitdo ni pilak. Ondaw kito ni kalebian nem maokip i posa, jet kito mengeda ni pilak ja iakan tayo ni abalon bii."


Jet nontan ja dabi, dimaw ired baley ni baknang, jet kinetket sha i kakon ni pilak. Indara i pilak tan

balitok shi kakon. In-ilaw sha shi baley ni abalon bii. In-an ni abalon bii i pilak shi shat-al to. Say dekeb, kaonong ja naybagat; isonga amta to ja enshiy toon angidaw ni pilak; jet ninemnem to jey in-ilaw ni otot i bayad ni kinan sha.

1. Ngaranni namtikan ira nonta otot shi baley ni baknang?
2. Towey dinaŵan sha mowan?
3. Ngaranni kowan nonta abalon bii ja al-en to?
4. Ngaranni an angala ira nonta otot shi baley ni baknang?
5. Amta nonta abalon bii i angidaw ni pilak?

#### DINGKA NI AKI I BALEY NI PALASHONGAY

Idi sakey ja akew, ŵarey bakes ja nanba-jat shi panga ni kiyew. Inon-an to i sabadin bakes shi panga ni kiyew shi nayshalem ni shanom. Say bakes, adirong to shorog. Inkapo to i tabtabal nonta sabadin bakes, nem ag imebas. Bimonget sota sakey maney sota sabadin bakes, ag imebas, jet inkowan to, "Ano nem kaka mantangsit."



Inkapo to i kangol nonta sabadin bakes, jet sota sabadin bakes, inkangol to son si-kato. Jimapas shi bu-day, jet kinespigan to ni pating sota sabadin bakes, nem kimaljap shi shanom. Bimonget ja pasia, jet jimabtok shi shanom ja to binckal sota sabadin bakes, nem shineshal ni bato i edeng to; jet ninemnem to jey pineg-as nonta sabadin bakes i edeng to.

Imolid da-sang jet inodop ton emin i kait to. Idi imoli ira, inon-an sha i shakel ja bakes shi shanom, jet ninemnem sha jey sota sabadin bakes, inodop ton emin i kait to.

Sota palashongay, amansiyang shi kilig ni shanom; inkowan to, "No idag-an joak ni baley, ondawak shi shanom jet nak bekalen ima sabadin bakes; pebtik ko ira."

Timolok sota bakes: sota palashongay, dimaw shi shanom jet kinidot to i shanom. Si-kato i ag shaso

inon-anan nonta sabadin bakes shi shanom. Jet indag-an sha sota palashongay ni baley to.

1. Towey kad-an nonta bakes?
2. Ngaranni inon-an to shi nayshalem ni shanom?
3. Apay nga bimonget sota sakey ja bakes?
4. Sipa ira i to inodop?
5. Ngaranni dingka nonta palashongay shi shanom?
6. Agpayson bakes ira sota in-an sha shi shanom?
7. Ngaranni dagbo ni palashongay?



SOTA OTOT TAN SOTA KILING

Nontan da, inan-aspol kono i kiling tan otot, jet inantabtabal ira.

Kowan ni otot, "Kiling, mapteng kon ishemang ita bokdew mo, ni kaambalenga to. Ngaran i inpasing mo ja inpabedanga ni bokdew mo?"

Kowan ni kiling jey "Si-kak i sakey ja titit ja amengikowan ni too jey 'Niman i timpo ja pan-a-shen jo mowan ni kintoman.' Jet si-kato i naka kelkel-jawi. Ashakel kamin kiling shi emin ja ili: onkaneljaw

kami; kowan mi, 'Kiling! Kiling!', jet satan i amtaan ma ni too jey mimotok i timpo ja pansekana ni pan-a-shen ni kintoman. (Tep nontan da niti, ag amta ni too i ngaran ni bolan. Amandebas ja kenshat i akew. Amēwā-wā, adabi, aŵa-wā, adabi.) Dimawak shima eshom ja ili, naka onkelkeljaw. Kowan kod ma minotokan kon ili, 'Kiling! Kiling!' tepno amtaen ni too jey mimotok i bolan ja pansekana sha ni pan-a-shen sha ni kintoman. On-an ko ja ag shaak ipaay ni too nodta ilin dinaŵan ko. Imangetak ni bonget ko; kinedked ko i bokdew ko. Nem akak etey. Amag-an sota shala; si-kato i binedangaan niya bokdew ko. Idi inon-an ni too ja mapteng i nemnem ko, naka ikelkeljaw i pansigshan sha, ansemek shaak.

Sajay bokdew kon ambalenga, sisiked shen ishemang. Isonga no ishemang moak ngo, makelting i moaksoka ishemang. Mapteng mo. No onoran mo i inpasing ko, ja kedkeshen mo ngo i bokdew mo, ansemek sha ka ni too. No mengan ka ni pagey, ag sha ka ebolen. Ag sha ka ial-an ni posa ja mengosil son si-kam tan mengan so nen si-kam."

Sota otot, singa ayshiy nemnem to: inonod to i owaowap ja inkowan ni kiling. Kinedked to i bokdew to ni tarcm ja taed—nem towey angalaan to ni taed—shimala, jet inanteng-ay ja etey. Saman i kaonan to jey manmnemnem i kiling jey say otot.

1. Sipa ira i nan-aspol ja nantabtabal?
2. Ngaranni kowan ni otot so ni kiling?

3. Pinati ni otot i kowan ni kiling?
4. Apay nga ambalenga i bokdew ni kiling?
5. Ngaran ngo i inpasing ni otot ni bokdew to?

#### SOTA TINGEY TAN SOTA TILAY

Ŵarey tilay ja amansiyang shi abadeg ja bato, jet jimabtok i tingey adapod shanom inay-olop son si-kato; toka pan-ikowan. "Mapteng i inpan-emes ko. Ag ka man-a-mes? Nem sigosho ag mo amten man-nengoy tan kaka ontakot shi shanom."

Inkowan nonta tilay, "Mebedin met ja onnangoyjak, nem say shanom, angketit. Piyan kon man-iyān shi kamag-an."



Inkowan ni tingey. "Kala, maon-an nem sipa i makedsang ni nangoy."

Jet intolshon to i tilay shi shanom. Sota tilay, nimangoy ni abos shi bato, nem sota tingey, bimaliw shi shanom jet nan-ohi. Idi simbi to i bato, inkowan to, "Niman, ishemang mo i katekal ko ni nangoy. Warey mebedin mon deg-en? Bilang ey, on-an ta i onjabtok ni arawi."

Sota tilay, ag to koston onjabtok, nem sota tingey, intolshon to mowan shi bato, jet ina-kas shi bo-day. Jet jimabtok i tingey shi arawi jet imoli shi bato; toka pan-ikowan, "Inon-an kon ag mebedin ja onjabtok ka ngo. Nemnem ko ja kaka onbebaing ni enshiy amtam ja deg-en. Nem sigosho amtam ja mankansion. Maon-an nem sipa i mapmapteng i kansion to."

Sota tingey, inkapo to i kansion ni mebedin ja pesing to. Toka pan-iseet tan toka pan-iseet i kansion to, nem sota tilay, toka idododop i kansion to, jet singa ag maytetnengan. Sota tilay, inon-an to i bokaw ja amantejab shi naykayang. Sota bokaw, intenengan to i kansion ni tingey. Nem sota tingey, aman-aagag ni kansion, si-kato i ag to inon-anan so ni bokaw. Sota tilay, bintik to i inaydoong ni bato, nem sota bokaw, inshel to i tingey.

Sota tilay, pimangwaw i toktok tod diyang, jet kowan to so ni tingey. "Mapteng ken mannengoy, jet naka outakot. Nem ag mebedin ja mannengoy

ka no ayshiy shanom. Mebedin mon jabtoken i arawi, nem ag mebedin shita aliwen shaga. Mapkes i kansion mo, nem ayshiy amengitneng nen si-kam sakey ni bokaw, nem akak nemnemen jey piyan to

i kansion. Piyan ko i kinatlay angken akak amten mannengoy, jabtok, tan kansion, nem mapteng i matak ja mengidmang ni bokaw nem toak a-sheden."

1. Towey apansiyangi nonta tilay?
2. Ngaranto ira i dingka ni tingey ja ag mebedinan ni tilay?
3. Sipa i angitneng ni kansion ni tingey?
4. Towey nan-emotan ni tilay?
5. Inon-an ni tingey i bokaw?
6. Sipa i inda ni bokaw?

## KAPOAN NI BESHING

Nonta bayag da, enshiy beshing. Say awaraan ni beshing, iyay i istoria to.

Wara kono i sau eaki. Ashakel ira. Sakey ja agsapa, nanbayo ira ni pagey ja para shomen. Naksheng iren nanbayo jet angan ira ni shomen, nem ag sha inakuan si Petit ja orishian sha. Kaon-keshkeshew ni shomen si Petit, nem ag sha pepatien.

Bimaing si Petit, jet nankes-ong shi bajoan. Angala



ni sakey ja kiyag, jet inansa-keb shi bajoan. Imeket ma ni olay shi bajoan ni apos to.

"Towa des Petit?" sinedodsod nen ina sha. "Jodi olop jet mengan kito."

Idi dokatan sha i bajoan, shakel i kokonting ja titit ja imetpok, jet timanejab i shakel ja titit ja kaonkaneljaw. Say esel sha. "King! King! King!" Inam-tara ma jey si Petit i nanngaran ni kokonting ja titit. Say inkowan ma ni totoo ja ngaran ni kokonting ja titit, "petitan" ono beshing.

1. Ngaranni inbayo ira nonta san aaki?
2. Sipa i agi sha ja ag sha inaknan ni shomen?
3. Si Petit, towcy nankes-ongan to?
4. Ngantoy nanpa-noan nen Petit?
5. Ngaranni ingaran sha nonta kokonting ja titit?

#### SOTA MATANGSIT JA KAWITAN

Warey kawitan ja matangsit. Toka bekala i eshom ja manok ni olay jet toka pidiwi ira ni shaka kena. Toka ianteng i kakaok jet toka ikowan ni kait to jey matekal ja kawitan. Ag onpatok shi kagaban ja maykemot shi eshom ja manok, nem si-kato, kaonpatok shi kadasan ja nay-askang shi kagaban.

Idi sakey ja palbangon ja pasia, intenengan ni tabaw i kakaok to jet dimaw nodta kadasan ja kape-toki ni kawitan. Sota kawitan, nasdengan ni in-oney to so ni tabaw, jet akikaasi so ni tabaw.

Inkowan to, "Aramak al-a. Si-kak si Kawitan ja apo ni manok, jet adakayjak tan andayotak. Mebedin mon mengeda ni eshom ja manok ja ngalobo tan andopet. Magenon oubo-day ired kagaban."

Sota tabaw, insongbat to, "Si-kam i piyan ko. Imekdasak ni teneng ni esel mo ja poro kospag. Angken adakay ka tan andayot ka, abadeg ka, jet mebejag ja kenen taka."

Say eteyjan nonta kawitan, sota kospag to.

1. Towey kapetoki nonta kawitan?
2. Ansemek nonta eshom ja manok sota kawitan?  
Ngantoy?
3. Ngaranni eteyjan nonta kawitan?



SOTA AKI TAN SOTA POTJOKAN

Sakey ja bakes, dimaw shi baley ni potjokan, jet nangshew ni dinoan.

Sota potjokan, inkowan sha, "Ngantoy ag mo pan-obdaan ni penganan mo? Kamika man-obden pasia ni daga ni dinoan, jet ag mi ka aknan. Magenon onmotok i powek jet mesepol min emin i dinoan ja intalo mi.

Sota bakes, insongbat to, "No ag joak aknan ni

dinoan, al-en ko. Akak mesepol ja man-obda ni kenen ko. Makedsangak tan matekalak, jet mebedin ja al-en ko ni eshom ja aman-obda.”

Sota potjokan, insongbat sha. “Mebedin min meki-bekal ingesto i obda. Namat mon al-en i dinoan say pan-odi mi ka.”

Sota bakes, toka ngi-ngii ira; toka panikowan, “Ha, ha! Abadeg i esel jo nem kokonting kayo! Mebedin kon ebolen i pigan dibo son si-kayo ni pinsak ja sopsop ni tabako.”

Sota bakes, inkapo to i pangan ni dinoan, nem sota potjokan, kinkindat sha ni pinshakel i tamil to tan mata to. Inkapo to i betik shi baley to, nem dimarag i tamil to tan angisip i mata to, jet ag onshemaug. Ag simabid baley to jey mimotok i powek. Ag to mebedin ja on-an i shakel ja shanom; si-kato naanoshan to.

1. Apay nga ag sha inakuan ni dinoan sota bakes?
2. Ngaranni apasamak so nonta bakes ni inpowek to?

#### NANBALHAN NI TINGEY SHI SHANOM

Sota imok, timayab jet dimabas shi baley ni tingey. Kowan nonta tingey, “Kala. Nabdey ka emo.” Idi simepa sota imok ja onsekep shi baley ni tingey, sota tingey, ngima-ta ja kowan to jey kenen to i imok, nem sota imok, inamtik. Bimonget sota imok, jet piyan ton kedaten i tingey, nem timakot. Jet sota



kemkemti i kindat to. Kowan ni kemkemti, “Ngantoy kindatan moakso?”

Insongbat ni imok, “Maney sota tingey, kowan to jey kenen toak nonta simepaak shi baley to.”

Sota kemkemti, pinoolan to i baley ni tingey; si-kato i nanbaljan ni tingey shi shanom.

1. Sipa i tineŵal ni tingey shi baley to?
2. Sipa i kindat ni imok?
3. Ngaranni inpasing ni kemkemti ni baley ni tingey?
4. Towa ma i nanbaljan ni tingey?

#### SHOWEN BANGOL

Warey apigot ja bangol. Toka pan-edoba i pitoy, idi dimaw aliy mateben bangol. Kowan to nonta mateben bangol, “Ngaranto i moka pandeg-a?”

Insongbat nonta apigot ja bangol, “Naka mengenap ni kenen ko tep naagangak.”

Kowan nonta mateben bangol. “Naagang ka? Ngantoy moka pan-obdai ja pasia para ootik ja damot?”

Olop moak jet itod-an taka ni doktoan. Nem mengan ka ni dokto. ontaba ka inges moak.”

Nem insongbat nonta apigot ja bangol, “Naka on-takot ta on-an toak ni too. No mateba kita, piyan ni toon kenen sha kita.”

Nem kowan nonta mateben bangol. “Ondaw kita nem medebi nem maokip i too.”


Insongbat nonta apigot ja bangol, “Angkena. Sota too, onbangon ira, jet bonoen sha kita.”

Kowan nonta mateben bangol. “Nem on-an ko i too, ag kita ondaw shi doktoan. Dimawak shima doktoan ni shakel ja dabi. jet ikowan ken si-kam jey sota too, iraka maokip ni olay ni dinedabi.”

Nem sota apigot ja bangol. insongbat to i “owen” ni abos tep ag to koston ondaw. Nontan ja dabi, sota mateben bangol, dimaw shi doktoan. Simalsheng shima edet, ja toka pan-on-iy too. Jet ayshiy to inonan. Jet dimaw shi doktoan, jet ina-kas shima bito ja bingkaan ni too. Nonta sakey ja palbangon, simpel ni too jet binora.

Idi nonta sakey ja akew, jey ag mimotok, namnama nonta apigot ja bangol jey insedad sha. Kowan nonta apigot ja bangol so ni bakdang to, “Sisiked i apigot ja bangol shi kakadasan jey say mateben bangol shi paljok.”

1. Towey kowan nonta mateben bangol ja dawān to nem medebi?
2. Akidaw sota apigot ja bangol? Ngantoy?



3. Nan-oli sota mateben bangol ja dimaw shi doktoan?
4. Towey na-kasan to?
5. Agpayso noman i inkowan ni apigot ja bangol?

#### AG NAOGIPAN NI BAKES

Abadeg ja bakes, nanbaley shi da-sang nay-askang shi shanom. Sota tingey ja nanbaley shi kilig ni shanom, kaonngagngagngag, jet ag naogiogip sota bakes. Dimaw, to inon-an ima tingey, jet inkowan to, “Ngantoy joaksoka notengi? Joakka bengobengona ni olay.”

Inkowan ni tingey, “Mika ngi-ngi-ngiyy palashongay tep toka ojoojona i baley to. Ngag, ngag, ngag,” ngi-ngi ni tingey.

Sota bakes, dimaw shima kad-an ni palashongay, jet kowan to, "Ngantoy mosoka ojoojoni ni baley mo? Shakaka ngi-ngi-ngii ni tingey; nakol ni akak makaogip."

Inkowan nonta palasongay, "Naka ojoojona i baley ko tep naka ontakot ni kemkemti. Shaket poolan to i baley ko."

Sota bakes, tinewal to i kemkemti, jet inkowan ni bakes, "Ngantoy mosoka eg-egshii ni apoy? Sama palashongay, kaontakot ja poolan mo i baley to; si-kato i tosoka ojoojoni ni baley to; si-kato i kangi-ngi-ngii ni tingey; si-kato i akak kaokipan. Naka menoteng ni ngi-ngira."

Inkowan nonta kemkemti, "Naka amengeg-egshi ni apoy tep naka ontakot ni imok ja kedaten toak."

Sota aki, tinewal to i imok, jet inkowan to, "Say kemkemti, amengeg-egshi ni apoy tep antakot ja kedaten mo. Sama palashongay, antakot ja poolan ni kemkemtiy baley to, jet kaonngi-ngi-ngiy tingey tep toka ojoojoned beng to i baley to; nakol ni akak makaogip."

Inkowan nonta imok, "Menongpitak nin asannaka kaleta i kemkemti, say ag mesopol ja mengeg-egshiy kemkemti ni apoy. Say palashongay, ag to ojoojonen i baley to, say ag ngi-ngi-ngian ni tingey, say maokip ka."

1. Towey nanbaljan ni abadeg ja bakes?

2. Sipa i shaka ngi-ngt-ngii? Ngantoy kono?

3. Sipa i katekoti ni kemkemti ja onkalat?

4. Sipa i kaonoran ja inbag-an ni bakes?



## KAPOAN NI BOKAW

Nontan da, Warey san agin bii tan dakin aman-ebol ni beshing shi payew. Idi alas shosi, bingka to i orishian ton bii ja mengeda ni kenen sha. Kowan to, "Ka di pangeda ni aba."

Nem say in-akan nen ina sha, kopsit ni aba. Jet inmotok tod abolan. Idi inon-an nonta agi ton daki i kopsit, ag sha kinan. Jet in-ibong shed doongan ni abolan. Bingka to mowan si agi to ja mengeda ni dokto, jet in-akan to mowan i kamod ni dokto. Idi inon-an nonta daki ja kamod, in-eshom sha shi kopsit ni aba. Inpan-oli to mowan si agi ton mengeda ni manok ja sid-an sha. Nem shotshot mowan i in-akan to. Idi on-an nonta daki, ansiksikshal. Jet dimaw shi doongan ni abolan. Say inpasing to, intebetebek tod bakdang ton emin i shotshot. Jet timayab shi naykayang. Inpekis to, "Twik! Twik! Mantejatejabak tep inikotan joak. Nangshewak ni aba; kopsit i in-akan jo. Nangshewak ni dokto; kamod i in-akan jo. Nangshewak ni manok; shotshot i in-akan jo." Sota agi ton bii, nimangis ni intayab ni agi to. Idi imakad i beshing, imakad ngo. Inkowan to son ama to jey

nanbalin si agi to ni bokaw. Sajay i kapoan i bokaw.

1. Sipa i imakad ja mengeda ni kenen sha shi payew?
2. Ngaranni in-akan nanang sha ni pilmiro? ni kapin-showa? nonta kaonoran?
3. Kinan sha ira sota balon sha?
4. Towey dinawan nonta agi to ja daki ni in-apos to?



5. Ngaranni nanpa-noan nonta daki?
6. Ngaranni kowan to nonta timayab shi naykayang?

## ADAGITAN JA ADAKAY

Warey sakey ja adakay ja abayabayang i angel to. Inanpasia shi shontog iyay ja adakay. Nasnaskitan shi shontog jet piyan ton pasia ja man-inom. Intotoloy to i akad ingkatod simbi to i kadnan ni balebaley.

Simbi to i baley ni sakey ja baknang. Nanbaga ni shanom. Kapota adagdagitan tan amengiskig i bayang to, singkig sha jet inkowan sha jey enshiy shanom sha. Sinolsol to irey balebaley. Nan-iinges



ira. Idi koston simbi to i baley ni kakaasin pamilja ja enshiy shaka pansepoli, inakkan sha ni shanom. Aman-iimdeng sota adakay tep nan-inom ni shanom.

Sotan gayam ja adakay, anghil nen Apo Shiyos ja inanparang son si-kara, nem ag sha inmatonan. Isonga niman, angken ngantoy itsora ni toon makasapol ni tolong, metodongan. Basta kebedinan i tolong ja pan-ibaga.

1. Towey adapoan nonta adagitan ja adakay?
2. Makabaley ni simbi ton pilmiro?
3. Ngaranni toka pan-ibaga?
4. Sipa i angi-kan son si-kato ni shanom?
5. Sipa satan ja adakay?

**"BANGEW! BANGEW!"**

Naktel si Masing shi shontog jey ayshiy to inenopan. Sorong to i on-akad. Simbi tos Kitan ja sesakey tod abong.

"Towes Nanang mo mango?" inbaga to. "Ayshi, Tatang. Kowan to jey an mengeda ni kakoy shi oma. I kaydaw tola."

In-aral nen Masing i kayang tan pana tod shogo. Dina-sos to i sakey ja masshel ja bangew, jet insingpet to ni baro. Bimoday jet insagana to i kiyew tan saleng.

"Kitan, alam aliy ta bonot tan sikkad shi doong ni apoyan."

“Owen, Tatang.” Aliston songbat nen Kitan.

Mapkes i shagem. Amanngisiw i mangka tan akayang ja kiyew ja nandiked shi abong sha. Iningsaan sha i esel ni kiyew. Ansemek sha i shontog. Ansemek sha i kansion ni titit. Inpan-ingsara i keljaw ni akop tan kangaw ni malebi.

Sisiked i shangshang sha. Nanjako-mos si Kitan ni amayo to.

“On-im ita apoy, Kitan. Mesi-naban i bowek.” kowan nen Tatang.

Nanpigad si Masing. Inbeneg to i apoy. Ayshi bayag to jey onsikmat i apoy shi baro ton bangew. Maredang i bangew. Ag to amta i pesing to. Amanbintik ja kaonkelkeljaw, “Bangew! Bangew!” kowan to.

Nasdengan si Kitan. Inteneng nen Chamja i keljaw. Kimagos ni shalong shi abong. Simbi ton amandikat ja pasia si Masing jet inshep to i apoy ni inesol to.

Ashamag iyay ja istoria, jet inpanngaran sha iyay ja ootik ja ili ni Bangao.

1. Sipa i dimaw shi shontog ja mengenop?
2. Sipa i simikmat i baro to shi apoy?
3. Warey angitneng ni keljaw to? Sipa?
4. Ngaranni inpanngaranan sha so nonta ili ni Bangao?

